


**LAPI CORALITI
JUDICIUM DE
DUOBUS P. JOANNIS
DE DEO STAIDELII
LIBRIS, QUORUM...**

Carlo Antonio Pilati







Incredibili animus noster voluptate perfusus est, cum P. Staidelii Librum de Lege Naturæ vulgatum fuisse accepimus; cujus quidem Operis ab eo die, quo primum nobis illud edendum esse nuntiatum est, magnum nos tenebat desiderium. Nihil enim causæ erat, cur dubi-

taremus, quin multas res præclaras, singulares, minimeque tritas, & circumforaneas Liber iste contineret. Nam cum sciremus, alios viros hoc eodem in argumento elaboravisse, & Finettum in eo, quem de principiis Juris Naturæ inscripsit, Opere multum pro Lege Naturali disputasse, Pilatum vero pro eadem Lege adserenda librum singularem anno superiori edidisse, eam animo imbiberamus opinionem, ut Staidelium non aliter, quam si pro certo haberet, se melius, doctiusque illis duobus scripturum esse, ad scribendum accessurum fuisse arbitraremur. Præterea Literis multorum significatum est nobis, magna hunc Virum apud populum in existimatione esse, tum quia Clero suo Enchiridia ex Theologia Morali popularia sane, atque benigna componit, tum aliis etiam de causis; quas nihil opus est hoc loco recensere; quàmòbrem populus ille prædicare, atque exclamare sæpe solet.

*Vab! Solus hic homo est, qui sciat divinitus
Hunc hominem decet auro expendi: huic decet
Statuam statui ex auro.*

A 2

Sed

Sed postea quam editum est Staidelii Opus, & nos illud nacti sumus, magnus consequutus est dolor, cum spem nos fefellisse, & rem aliter, quam cogitabamus, cecidisse cognoverimus. Nihil enim in toto libro reperire potuimus, quod laudem aliquam mereri videretur, præter bonam mentem, quæ auctorem ad hoc Opus suscipiendum adegit. Itaque cum me ita frustratum, atque deceptum viderim, non potui me continere, quin aliquibus eorum, qui mihi tantam hujus Operis expectationem fecerant, quique tum forte præsentibus erant, in os dicerem, atque effutitem illud Plautinum:

*Exite, agite, ite ignavi, male habiti, & male conciliati.
Quorum nunquam quicquam cuiquam venit in
mentem, ut recte faciant.*

Neque ego homines magis asinos unquam vidi.

Jam nollem quemquam hic suspicari, certum esse mihi, atque propositum Staidelium maledictis impetere, atque Opus ejus aceto perfundere: neque enim causam ullam ejus rei faciendæ habeo: quippe hominem hunc non novi, atque utinam ne Opus quidem ejus unquam novissem: liceret enim mihi nunc animo esse tranquilliori, neque hanc haberem adversus ipsum querimoniam. Sed quando Librum edere voluit, operæ pretium est, ut commonefiat, quam largiter gravissimeque peccaverit, quo deinceps ab earum rerum, quæ ignorat, tractatione absteat. Admonitoris igitur, non adulatoris officio fungar, & ipsum Staidelium, quæ ab eo in libro suo præstita, quæque omissa fuisse voluissem, amice monebo, atque adeo secum ipse percurram. Jam igitur tecum, Staideli, agam, & in pauca conferam, quæ a te facta, vel non facta maluissem.

Primum vellem, ut ne latine scripsisses: tum ut ne tam inordinate, atque confuse omnia in unum acervum con-

contulisses, & alienissimo æque, ac suo loco collocasses : præterea ut illis argumentis, quæ ad Legem naturalem probandam, atque confirmandam e tuo depromsisti ingenio, plane usus non esses ; in argumentis enim feligendis adhibendum est judicium, ut falsa pro veris non arripiamus, ut levia semper rejiciamus, nonnunquam etiam communia, & minime necessaria prætermittamus : denique vehementer cuperem, ut Dialecticem, quæ recte judicandi vias diligenter persequitur, melius coluisses : nam cum omnis ratio diligens differendi duas habeat partes, unam inveniendi, & alteram judicandi, tu in neutra elaboravisse, sed utramque deseruisse videris.

Jam venio ad id, quod initio dixeram, noluisse me, latino sermone usus esses. Me, quidem, quominus eodem sermone mea quælibet alterius argumenti opera exarare, difficultas linguæ rejecit. Ego, enim ita semper existimavi, aut nihil omino scribere, aut ita scribere oportere, ut nauseam Lectori bilemque non moveas. Nam qui non potest, qui vitiose facit, qui denique non ita, ut decet, scribit, hunc vel ad id, quod potest, detruendum esse puto, vel cum satius est plane nihil, quam tam male scribere. Quamobrem multi viri docti italicis litteris uti maluerunt, quibus cum facilius, tum rectius possent, quæ volebant, expromere, quam latinas adhibere, quibus concinne, jucunde, copiose, laudabiliterque differere, homini præsertim non magnopere exercitato difficillimum est. Idem tibi, Staideli, faciendum fuisset arbitror. Homo enim, ut tu es, multis aliis studiis, laboribus, negotiis deditus, satis multum præstat, si omnes Auctores Latinos, ut Plautum, ut Columellam, ut Horatium, ut Juvenalem, aliosque ejusmodi intelligit : hunc autem ipsum latine etiam scribere his quidem temporibus vix possibile est. Quare tu quidem dicendi genus adeo horridum, agreste, incultum, rusticanum amplexus es, ut oratio tua non latina, sed aut gotica, aut lon-

longobardica vetus videatur . Nil dicam de barbarismis, quibus opus tuum refertum est , inter quos illa vox *Lusitabundus* , quæ statim in principio libri pag 9. reperitur, eminet : omittam etiam solæcismos , quos sæpe in deliciis habes , ut cum *qui* pro *cui* , aut *qui* pro *quæ* , vel *quæ* , veluti pag. usurpas , atque ita ulurpas , ut culpa non in Librarium , sed in te tantum tuamque latinarum litterarum ignoracionem coniici possit . Sed de illa tantum dicendi ratione , quam sequutus es , loquor , quæ quidem tam hiulca , tam jejuna , tam sterilis , tam vilis , atque abjecta est , ut ferri profecto nequeat . Crede mihi , non aufert me maledicendi studium : non institui Satyram adversus te scribere : Quemvis potius , & quidvis carperem , quam te tuumque dicendi genus . Amor in te meus facit , ut te admonere velim , quid posthac tibi faciendum putem , si alios libros , quorum vereor , ne jam nimis multos edideris , conscribere aliquando in animum induxeris . Scio te latinis litteris vehementer delectari : scio etiam te boni Scriptoris famam esse apud aliquos consequutum . Non facio libenter , ut hunc ex animo tuo errorem evellam ; sed tamen tenebriones isti , qui tuam latini sermonis peritiâ apud te commendant , te mirum in modum decipiunt , & honori , existimationi , ac dignitati tuæ nimis profecto male consulunt . Singuli enim libri tui , & in singulis libris singulæ pericli , singulaque membra ingentes tuas occupationes , quæ te a studio linguæ latinæ arcuerunt , palam produnt , atque declarant . Non enim continuo latina verba latinam efficiunt orationem : sed est quædam latini sermonis proprietas , & orationis structura , quam qui non assequuntur , barbari sunt , & barbarorum more scribunt , si vel latinissimis verbis utantur ; tum ex ipsa collocatione , & conformatione verborum existit quædam suavitas , & jucunditas orationis , quam qui negligunt , rudes , & agrestes adpellantur . Hanc autem facultatem nemo , nisi qui diu multumque scriptarit ,

tarit , consequetur . Præterea in Scriptore certos quosdam & animi , & ingenii celeres motus existeret oportet , qui ad excogitandum acuti , & ad explicandum , perpoliendumque sint uberes . Sed quæ ad recte scribendum pertinent , non omnia inseri , & donari ab arte possunt , sunt enim pleraque dona naturæ . At vero ego hanc ab-solutionem , perfectionemque in te desiderans , a qua ipse longissime absum , impudenter facere , & tibi , & hominibus nostris videbor : nam alteri vitia exprobrare , quibus ipse non careas , non ejus est , qui vereatur reprehensionem doctorum , atque prudentium . Sed videor mihi tamen ea de causa mereri veniam , quod cum Opera mea scripsi , difficultatem linguæ latinæ agnoscens , litteras italicas elegi , & desperatione debilitatus experiri id nolui ; quod me assequi posse diffidebam : nunc autem necessitate quadam impulsus latinè scribo , quia tecum ago , qui hanc de Lege naturæ materiam vis latinis litteris nos prosequi debere , & italicum sermonem adspernaris . Tibi autem ego quidem ignosco , qui sciam occupationes tuas maximas , quæ te rectam scribendi rationem sequi , & colere non patiuntur ; sed doctorum tamen virorum reprehensionem vix effugies , quod tua sponte ejusmodi genus litterarum amplexus sis , quarum cognitione carere videris : nam ut Bacchus apud Aristophanem ait :

Verba bubula elocutus

Es , quæ cristas haberent , & supercilia terrificæ ,

Larvata , spectatoribus ignota .

Itaque a latinis litteris deinceps abstinendum tibi esse puto , quo melius honori , & dignitati tuæ consulas : tum ut ordinem quoque melius serves , auctor tibi sum : nam quantum quidem ex Opere tuo colligere licet , omnem ordinem , atque rectam rerum dispositionem negligere , & respuere videris . Mihi quidem nihil ordine aut pulcrius ,
aut

aut præstantius, aut ad usum commodius esse videtur. At apud te, quæ in principio operis dicta sunt, in fine, & in medio ejusdem sine ulla necessitate repetita leguntur; itemque ea, quæ Lector hoc in loco expectat, alibi collocata reperiat. Sed omittamus ista, & Rhetoribus, atque Grammaticis relinquamus.

Nunc ad id, quod totius rei caput est, veniam: & ad ipsam disputationem tuam pro Lege naturæ adgredior, argumentorum tuorum vim, atque potestatem, rationumque momenta examinaturus. Ego vero, ut id, quod vere sentio, fatear, argumenta tua, quibus ad Legem naturalem probandam uteris, adeo debilia, atque infirma esse arbitror, ut putem, te illis, qui te non norunt, in suspicionem venire posse, ne eam Legem, quam in speciem defendis, re ipsa tollere, atque subvertere conatus sis. Videtur hæc accusatio adversus te jure institui posse, quia optimas rationes, quæ ab optimis Auctoribus allatæ sunt, neglexisti, & earum loco pessimas ex arbitrio tuo confinxisti. Nonne Grotius, Cumberlandius, Pufendorfius, Cudworthius, Wollastonius, alique ad manus erant, ex quibus optima potuisses pro Lege naturali tuenda argumenta sumere? Aut si hæreticos, odis, an non Antonii Genuensis Libros doctos, & subtiles habebas? Quod si & hic displicuisset, editum jam erat Patris Finetti de *Principiis Legis naturæ* præclarum Opus, qui Auctor, quamvis id, quod potissimum intendebat, non evicerit, tamen de iis, quæ ad Legem naturæ spectant, tam bene disseruit, ut mea quidem opinione omnium hominum nostrorum, qui ante eum scripserunt, conatus, & optimarum rationum electione, & judicii præstantia, & doctrinæ cum copia tum facilitate superarit. Tu ergo argumenta vel ab his petere, vel certe ex arca ingenii tui promere non debebas: ut ut enim non omni ingenio careas, nec omni fortasse doctrina, tamen alio hætenus spectarunt labores, vigilæque tuæ, & tua illa, quæ

9
quæ hucusque in Enchiridiis conscribendis in magica superstitione tuenda , & in sanctorum cultu defendendo veritata est mens , non potuit in Lege naturali tantum scientia , & cognitione comprehendere , quantum ad eam Legem adversus inimicorum impetus adferendam , atque tuendam requiritur . Multa lectione , tum optimorum , tum etiam pessimorum Auctorum , & multo judicio ad rem ejusmodi adgrediendam opus est : tu autem , ne eos , quidem Auctores , quos ipse citas , nosse videris . Nam primum sæpe uteris auctoritate Ciceronis , ut tanti viri testimonio adversariorum frangas impudentiam . At Cicero nem constat in Philosophia Academicorum doctrinam esse sequutum ; Academicos autem nihil negari , nihilque affirmari recte posse , docuisse , a quorum partibus se fere stare ipse Cicero professus est ; cum in ingressu operis ejus , quod inscriptum est de natura Deorum , palam dicat sibi videri , omnibus veris falsa quædam adjuncta esse , & adfertiendi nota . Quæ sententia quantopere ipsi probaretur , facile quilibet ex eius Libris , quibus quæstiones Academicas tractavit , sua sponte colligere poterit . Quamobrem hujus viri auctoritas nihil probat , ne apud eos quidem , qui non tam rationis momenta , quam auctoritatem in disputando quærunt , & suum judicium adhibere desinant , simul ac vident , quid ab eo , quem probant , judicatum fuerit . Cicero sapissime oratorem agit , & ex vulgi mente , non ex judicio suo loquitur . Sæpe etiam alterius cujusdam Philosophi personam sustinet , ejusque sententiam exprimit , quomodo ab ipso in Libris de Natura Deorum factum esse animadvertimus . Qua quidem in re graviter a te , mi Staidelj , peccatum est , qui , quæ in his Libris de Natura Deorum continentur , tanquam ipsius Ciceronis sententias , doctrinasque profers , cum non hujus , sed aliorum Philosophorum , a quorum duobus ipse etiam valde dissidebat , sententiæ sint . An

B

ergo

ergo ignorabas, in primo Libro C. Velleium, ad quem tum Epicurei primas ex Romanis hominibus deferabant, disputantem a Cicerone inductum fuisse: in secundo autem libro Lucilium Balbum, qui mirificos progressus in Stoicis habebat, a Cicerone differentem adduci, postremas vero partes Cottæ insighi ex Academia Philosopho fuisse tributas? Qui quidem Philosophi uti diversis Philosophiæ principiis imbuti erant, ita sententiis inter se magnopere discrepabant. Quare jam tu te statueres potes, qui tam sæpe Ciceronem laudas, quantopere aliquando ejusdem sis injustus accusator, qui talem, tantumque Virum, quem tu ipse tanti facis, ut ejus sæpe auctoritatem adducas, alio in loco, id est pag. 87., de vitio manifestæ contradictionis accusas, eumque, quod a se ipso in re magni momenti dissenferit, reprehendis, atque coarguis. Atqui scire debebas non ejusdem Ciceronis esse illas, sed eorum Philosophorum, quos dixi, varias pugnantelque sententias: fuit enim omnes ex Libris de natura Deorum, in quibus Cicero Philosophos inter se variè, & in contrarias partes disputantes inducit, petiræ. Tu igitur hujus Viri testimonia, atque doctrinas ex iis locis, ubi non animi sui sensus, sed aut aliorum Philosophorum sententias, aut vulgi inanes opiniones exponit, producis? Vide quam sis eruditus, qui eundem, quem tantopere citas, Auctorem non cognoscis: at si non nosti, ne legisti quidem, sed aliunde textus illos Ciceronis decerpisti: qua in re tu mihi sacrorum oratorum aliquos imitari videris, qui ut concioni fucum faciant, textus ex Sacra Scriptura, & ex Sanctis Patribus, quorum libros nunquam legerunt, summa confidentia, ingentique clamore recitant. Qui vero optimos Auctores, cujusmodi Cicero est, nec noverit, nec legerit, quod in te Staidelj, homine Theologo, & ab aliis rebus districto valde credibile est, ei ego Auctor sum, ut de Jure Naturæ scribere nunquam in animum inducat suum.

Scio

Scio ego fuisse aliquos, qui ex ore tuo pendere solent, qui cum te, tuamque, quam hoc tuo Opere ostendisti, doctrinam, laudibus in cælum offerrent, valde mirabantur, quod non modo Philosophos tam bene, quam ipsi putabant, nosset, verum etiam veteres Poetas tam tibi familiares reddidisses, ut plurimos ex eorum libris versus pluribus in locis tam apposite citares. En, dicebant portentum hominis, en omnis doctrinæ, eruditio- nitque magistrum! Age nunc, videamus, quale porten- tum, & qualis magister sis? Tu cum capite 16. causas adferas, quamobrem Deus improbos homines non conti- nuo in hac vita puniat, unam dicis esse hanc, quod Deus velit hominibus tempus ad resipiendum perbenigne lar- giri. Deinde hos ex antiquo Poeta versus illico subjungis:

*Si quòties peccant homines, sua fulmina mittat
Jupiter, exiguo tempore inermis erit.*

Quid ergo? Deus Omnipotens, hoc numen immen- sum, infinitum, æternum, Terræ, Cœlique Conditor ullo unquam tempore, si vel infinita fulmina singulis diebus mittat, inermis fiat? O scelus, o flagitium! Quod veteres Poetæ inverecundi, impii, nefarii de Diis suis inanibus, fictis, fabulosis adfirmare non dubitabant, tu de Deo Optimo Maximo usurpare Theologus, & Chri- stianus audebis? O tempora, o mores! Etiam Theolo- gus ita loquetur hodie? Alius si quid ejusmodi dixisset, omnes in eum merito docti, atque indocti, senes, pue- ri, adolescentes, mares, & fœminæ impetum fecissent, & lapidibus obruissent. Nunc cum Theologus, & Stai- delius dixeris, omnes coqui, falsamentarii, cupedinarii, laniones, fullones, sartores, futores, balatrone tibi manibus, pedibusque plaudunt, & bene a te dictum esse dicunt. Sed nolo, Saidelj, invidiam in te querere: frui per me licet, hac tua gloriola. Bonus sis orator,

B 2

bonus

bonus poeta, homo sis etiam eruditus: non invideo tibi, non oblo, non repugno. Sed id tantum a te postulo, id flagito, id te etiam, atque etiam rogo, ut de Jure Naturæ non scribas. Aliorsum te vocant occupationes tuæ; his te præbe, his te dede. Nam profecto idoneus non es ad Jus Naturæ tractandum, quod declarant argumenta illa tua, quæ ex tuo cerebro protulisti. Confer ea cum illis, quæ Finettus, quæ Pilatus adduxit: videbis quam inania sint pleraque, & quam falsa illa, quæ tu excogitasti: cognosces te omnium optima silentio prætermisisse: deprehendes etiam te ea, quæ bona sunt, & ab aliis jam allata fuerant, minus recte, & ubi minime oportebat, adhibuisse, & sententiis bonis sensum non bonum tribuisse.

In prima operis tui parte ea persequeris argumenta, quibus Legem existere ipse probas: in secunda adversariorum rationes, atque sophismata diluere conaris. Videamus quæ sint primæ partis argumenta. Quamquam tu quidem eo in loco argumenta ipsa cum præceptis Legis ita commiscuisti, atque perturbasti, ut difficile sit existimare, quid argumenti, & quid præcepti vim tua saltem sententia obtineat, atramen quantum conjectura colligere possum, hæc tua sunt ad probandam Legem argumenta. Primum Religio, quæ ab omnibus populis colitur, deinde societas ad quam natura facti videmur: tum ingentis omnibus hominibus virtutis amor, odiumque vitiorum, post ipsa humani generis natura, & dispar hominum, belluarumque conditio, præterea ipsa cuiusque conscientia, denique Dei Optimi Maximi Providentia. Horum argumentorum alia ab aliis jam occupata fuere, alia partim levia, partim inepta sunt. Itaque cum nihil novi, nisi quod reprehensione dignum sit, tuum produxerit ingenium, tutius fuisset, si hoc tuo Opere Rempublicam non onerasses. Nam ut ab eo argumento, quod tu omnium primum posuisti, atque ex Religio-
ne

ne erga Deum, quem Nationes universæ semper reveritæ sunt, duxisti, incipiam, facis profecto inepte, quod rem omnium maxime controversam pro prima, omniumque optima ratione adducis. Sunt enim, qui constantissime negant singulos populos Religionem aliquam habuisse, aut nunc etiam habere, contra adfirmant & olim fuisse plurimas, & nunc esse multas nationes apud quas nulla suspicio Deorum sit, quam in rem testimonia Strabonis, Plutarchi, Pomponii Melæ, Gassendi, Huetii, aliorumque probatissimorum virorum adferunt. Quo posito isti hunc ratiocinantur in modum: nationes, quibus nulla est notio Dei, aut homines sunt, & ratione humana præditi, aut tertium quoddam constituunt inter homines, & feras genus; si homines sunt, cognitio Dei non est documentum aliquod, non præceptio, non doctrina humanæ, communisque omnibus rationis, sed est subtile quoddam, callidum, & ingeniosum unius, alteriusve hominis inventum. Nam si humana ratio Deum esse doceret, impossibile esset tot homines, atque populos tanto temporis intervallo in tanta ignorance tantæ rei constanter fuisse versatos. Hos autem esse, homines negare absurdum est. Sed si Deus non cognoscitur ab omnibus, ne Legis quidem naturalis notio communis esse potest. At si Lex communis non est omnium hominum, atque populorum, sequitur, nec naturæ Legem existere, quia quod naturale est, omnibus hominibus commune est. Vide, Staidelij, quo te coniciant homines isti, improbi quidem, at tales profecto, ut non quævis ratio, non quælibet Doctrina tua ad eos convincendos, atque debellandos idonea sit. Sed volo tecum mitius agere: largiar tibi nullam Nationem esse tam barbaram, tam feram, tam immanem, quæ Deum ignoret, nihil tamen inde pro Lege Naturæ inferre poteris: nam ut ut Deus sit, & hunc colendum, atque summa veneratione dignum esse concedam, adhuc tamen in quæstione manet, utrum

utrum Deus ille Legem aliquam tulerit, qua omnes homines teneantur, & quæ hominum genus, ut iustitiam colat, ceteraque virtutes, quibus potissimum societas conservatur, obligandi vim habeat? Tuum igitur argumentum id tantum probat, Deum existere, at Legem Naturæ conditam fuisse non probat. Potest enim voluisse Deus, ut suo viverent arbitrio homines. At, inquis, Deus res humanas curat, vitæque hominum consulit, atque providet. Quare ipse Deus voluisse Legem hominibus dare, & eos exleges non esse? Sed hoc de Providentia Dei aliud est argumentum tuum, quo in tuo opere uteris ad Legem Naturæ demonstrandam, quod a te fuit ab argumento superiori sejunctum. Itaque ad hoc posterius argumentum de providentia Dei non est recurrendum, nisi prius vis, atque protestas superioris argumenti de Religione hominum excussa fuerit. At ex hominum Religione nullum pro Lege Naturæ argumentum elici posse vidimus. Ergo hoc tuum argumentum ab alio argumento de Providentia separatum, atque disjunctum nullius momenti est: quia, quamvis Deus cognoscatur ab hominibus, & colatur, tamen utrum ab illo ulla lex lata sit, ignoratur. Tu tamen utrumque hoc argumentum de Religione hominum erga Deum, & de providentia Dei separasti, ratus eorum quodlibet satis magnam vim habiturum ad Legem Naturæ ostendendam. Quod, quatenus quidem ad primum argumentum pertinet, falsum esse vidimus. Jam vero cognita, atque perspecta imbecillitate ejus argumenti, quod a te primo loco positum est, progrediamur ad examen alterius argumenti, quod ex Providentia Dei ducitur, quod quidem argumentum, quamvis a te, qui ordinem adspernaris, remotiori loco allatum sit, tamen secundo saltem loco pertractandum erat, nec a priori tantopere ut fecisti sejungendum, præsertim cum primum nullam per se vim habeat. Ita igitur argumentaris. A Deo omnia a principio facta sunt, atque

atque constituta, & ejus infinita mente, ac ratione administrantur, atque reguntur: ergo ab eodem Deo vitæ hominum consuli, & provideri necesse est. Non providisset autem, si Legem non tulisset, quæ ad recta faciendum impelleret hominem, & a delicto evocaret, quare hinc efficitur, ut lex aliqua exilat, quæ non sit hominum ingeniis excogitata, neque scitum sit aliquod populorum, sed Divina quædam voluntas, quæ universos homines regat, imperandi, prohibendique sapientia. Ad dis præterea: cum fruges, & reliqua, quæ terra pariat, & tempestates, ac temporum varietates, cœlique mutationes, quibus omnia, quæ terra gignat, maturata pubescant, a Deo immortali humano generi tribui videamus, non est tantæ bonitati contentanea eorum opinio, qui nullam ab eodem Deo hominibus Legem, quæ ad eorum vitam regendam apta esset, fuisse tributam. Habet quidem, mi Staidelj, argumentum hocce tuum magnam speciem, & similitudinem veri; sed tamen nulla planevis ei inest ad fidem faciendam illis, qui a te in questione de Lege Naturæ dissentiant. Tute profecto scis, quam & olim fuerint, & nunc sint non sane pauci, qui a Deo hominum curam negant, quorum permultæ rationes, & a Cicerone præsertim Libro tertio de Natura Deorum, & a Baelio in ejus Operibus adferuntur. Hic igitur ut Deum esse largiantur, cum tamen nihil hominum causa agere, nihil inolari, ac ab omni cura vacare contendunt. Impia quidem, fateor, istorum opinio est; nam si omnibus hominibus idem persuasum esset, quæ posset esse justitia, quæ fides, quæ religio, quibus sublati perturbationem vitæ, magnamque confusionem sequi necesse est? Sed sicuti nulla est opinio tam stulta, atque nefaria, quam aliquis Philosophorum non probaverit, ita hanc, quæ Dei Providentiam tollit, multi, & magni nominis Philosophi, ut olim Academici, & nostris tem-

temporibus. Hobbesiani, Spinofistæ, Baeliani, ac Voltæ-
 riani sequuti sunt. Quare tu facis non nihil impruden-
 ter, qui cum adversariis Legem existere naturalem per-
 suadere velis; rationem ejusmodi pro fundamento doctrinæ
 tuæ ponis, quæ omnium maxime in controversiam venit.
 Nam si illa, quæ in disputando præmittis, ita compara-
 ta sunt, ut de iis tibi cum adversariis minime conveniat,
 numquam te poteris ad propositum referre, atque con-
 cludere. Omne enim argumentum probabile inventum
 esse debet ad faciendam fidem, sed id probabile non est
 in tua quidem causâ, de quo inter te, & adversarios
 tuos maxima animorum contentione disceptatur. Quare id
 tibi pro disputationis tuæ firmamento adisciscere, atque ad-
 sumere non debebas, de quo statim ita tibi est cum ad-
 versariis pugnandum, ut nunquam possis ad exitum per-
 venire. Sed non luctabor tecum hac de re diutius, &
 ultro concedam, Dei Providentia hominibus, & ab ini-
 tio consultum fuisse, & nunc etiam consuli, an ergo se-
 quetur Legem quoque a Deo cordibus hominum impres-
 sam, aut alia ratione latam fuisse? Nonne Deus huma-
 no generi rationem tribuit, ut ea duce tam bona quæ-
 reret, quam mala vitaret? Hæc nos a vita inhumani,
 & fera segregavit, hæc ad coeundum in Societatem alli-
 cuit, hæc nos urbes ædificare, magistratus creare, Le-
 ges ferre, fontes punire, benemeritos præmiis adficere
 docuit. Rationem igitur dedit nobis Deus, ut nos-
 metipsi nobis consulere possemus; quo vero modo con-
 sulere quisque sibi maxime vellet, hoc cujusque hominis
 arbitrio remittendum esse putarit; non voluit homines
 cogere, ut sibi consulerent, ratione eos tantum donavit,
 ut cum vellent, possent, sin nollent, omitterent. Satis
 igitur a Deo provisum esse videtur humano generi, dum
 eidem rationem dedit, qua, quæ ignorat, discere, quæ
 scit, alios docere, quæ bona sunt, quærere, quæ mala
 putat

putat , avertere , & relinquere possit . Nihil opus erat præterea . Rationem cum dedit , satis magnum a Deo munus datum est homini , quo hic se , vitamque suam regere posset , siquidem ratione recte uti volet . Ut autem documentis humanæ rationis Deus vim obligandi legem aliquam ferendo tribueret , minime necesse erat . At dicēs , si lex non adsit , ratione hac perpauci bene , innumerabiles vero improbe utuntur . Nam quæ libido , quæ avaritia , quod facinus , sine ratione perficitur ? Qui doli , quæ machinæ , quæ fallaciæ , præstigiæque sine ratione esse possunt ? Injustitiæ autem , intemperantiæ , & sevitiæ , quæ semina sine ratione essent ? Ergo dum quisque , quod cupit , ab altero vel fraudibus obtinere , vel vi extorquere conatur , totum humanum genus paulatim ruere necesse erit , si lex non existat naturalis , quæ homines in officio contineat , ut vero , quominus hoc , quod tu , Staidelj , putas eveniat , impediunt humanæ Leges , & Magistratus , quum eadem ipsa ratio nos juris , legum , & urbium societate devinxerit . Quare supervacanea est illa naturæ lex , quæ tantopere commendatur ; quam si Deus ullō unquam tempore tulisset , certe eandem tam clare promulgasset , ut nemo posset , an illa existat , dubitare ? Itaque tu te jam , Staidelj , vides , quam nihil probet , & quam infirmum sit , atque debile argumentum hocce tuum , quod ex Dei Providentia ducis . Melius igitur fuit omnino non adhibere , quam causam disputandi , & tui irridendi adversariis præbere .

Quare quum ea duo argumenta , quæ modo attulimus , nihili esse ostenderimus , necesse est te ad conscientiam recurrere , quæ impium , & flagitiosum hominem , non patitur esse tranquillum , sed ejus animum misere torquet , cruciat , atque dilaniat . Hoc quidem vere a te quadam ex parte , sed non totum dicituri , nam vera est , minimeque dubia adsertio illa & doctrina tua ; siquidem homo ita sit a pueritia instructus , ut quid Le-

ges verent , & quibus rebus supplicia statuta sint , didicerit . At si actio illa , quam tu Lege Naturæ turpem , atque veritam esse dicis , ejus Reipublicæ , ubi is , qui eam perpetravit , moratur , Legibus non corceatur , neque hic , quod de jure naturæ jactatur , aut sciat , aut sibi persuasum habeat , nullo profecto timore homo ejusmodi pallefcet , nulloque animus ejus torquebitur cruciatu conscientiæ : quod multarum docent exempla nationum , apud quas palam & sine ulla suspitione peccandi ea fieri scimus , quæ nos Jure Naturæ verita esse sine ulla dubitatione tenemus . Quamobrem hoc , quod a conscientia ducitur , argumentum , plerisque vitis doctis minime probatur , illudque tanquam leve , ac nullius momenti rejiciunt . Quod te quoque facere oportebat , si quod cupis , iis , qui ante te , ut Finetus , & Pilatus , eadem de re scripserunt , volebas disertior , acutior , doctiorque videri . Hæc igitur , quæ vidimus , argumenta minus nihilo sunt . Reliqua vero , quæ attulisti , non tua sunt , sed aliunde deprompta . Quare hoc tuo Opere minore , cum incommodo caruisset Respublica , in quam tu illo tuo labore plus mali , quam boni intulisti , præsertim , quum id , quod bonum est , non ex tuo fluxerit ingenio , sed ex aliorum libris a te fuerit derivatum .

Itaque fidem mihi in hoc , quod dicam , adhibeas , velim : Purus putus Theotogus non est idoneus ad Jus Naturæ ita ut oportet , tractandum , sed ejus est potissimum eo de jure scribere , qui ad arcana Philosophiæ penetraverit ; agitur enim de rebus , quæ ex intima Philosophia petuntur . At tu Philosophos non nosti : quod superius allatum de Cicerone exemplum facile declarat , cui cum aliud de Socrate subjecero , nullus jam erit amplius dubitandi locus . Tu Socratem , qui omnium Philosophorum castissimus , atque integerrimus fuisse perhibetur , multis verbis duobus in locis pag. 104. , & 128. accusas cum improbi viri officio usum esse , & omnes foeminas omni-

omnibus viris communes esse oportere, statuisse. Edic, fodes, quis balatro, quis tonfor, quis sutor hanc tibi de Socrate narravit fabulam? Quid causæ fuit, quomobrem Platonis inventum Socrati tribueres? Quid te impulit, ut Socratem ejus flagitii reum faceres, quod ne Aristophanes quidem insensissimus ejus inimicus eidem exprobat? An quum hæc scriberes Platonem, Xenophontem, Laertium, Stanlejum, Landesium Bælium, Vayerium, Brucherum, Burinium vidiſti, & quid de Socrate dicerent, indagasti? Si hos vidiſſes, falso abs te Socratem adulari cognosſes; sed quid ego tibi hos Græcos, Anglos, Gallos, Germanicosque auctores commemoro, cum ne eum quidem ipsum, cujus auctoritatem tam sæpe commendas, Lactantium, Firmianum inspexeris, si enim ea, quæ hic scriptor libro tertio capite vigesimo primo, qui locus a te ipso pag. 105. citatur, oculis tuis usurpares, neque alienis credidiſſes, quam falsa illa tua de Socrate opinio esset, deprehendiſſes. Nos hæc etiam in Schola, vel ab ineunte ætate didicimus, cum ludimagistri aliarum rerum omnium plerumque rudes, hæc tamen paucula de Socrate & Platone ſciant, sæpeque pueris narrent, quorum te obliuisci non oportebat.

Cum igitur tam injulte contumeliosus in Socratem sis, cave tibi, ne quis Socratis defensor eis te verbis adoria-tur, quibus idem ille Socrates apud Aristophanem in illa Comœdia, quæ nubes inscripta est, Strepsiadem increpuit.

*Per balitum, per Chaos atrum, per aera :
Nunquam vidi ego quemquam ita ingenio agresti, & bebeti:
Ita perplexum, atque obliuioſum: velut hic est,
— Qui etiam nugamenta leuicula,
Et ludicra, quæ diſcit, prius obliuiſcitur,
Quam didicerit.*

Quamobrem cum ab omni eruditione, ab omni Dia-

lectica, ab omni Philosophia, & ab omni orationis adiumento destitutus sis certe, tua te barbaries, aut aliquis genius male advocatus in nugas, atque ineptias impulit, quod tute ipse, si modo aliquid hominis habes, jam ultro fateberis.

Sed dicunt, te, cum ad hoc Opus tuum scribendum accessisti, id in animo habuisse, ut officeres nomini, atque exultationi eorum, qui ante te eadem de re scripserunt, quos Finettum, & Pilatum esse antea monuimus. Quod quidem tuum fuisse consilium non obscure ostendunt ea, quæ initio operis callide, atque astute, Sycophantarum more præfatus es, ut invidiam illis, præsertim vero Pilato, creares. Nemo est, qui non videat, quas insidias struere volueris! Nemo, qui non cognoscat, quas machinas adhibere conatus sis, nemo, qui non perspiciat quibus technis, atque Sycophantiis operam dederis. Sed frustra sunt labores, vigiliæque tuæ. Finetti Liber u niversæ probatur Italiæ: neque extra Italiam displicuisset, si eorum exultationem, quorum doctrinam revereri debebat, minus læsisset: Pilati autem Opus etiam a Gallis, & a Germanis ita collaudatum est, ut illi in Ephemeridibus Enciclopediis tom. 5. part. 2. anni 1765. sedulo, & cum attentione legendum esse dixerint, hi vero, ut in linguam Germanicam verteretur, optarint. Pilatus autem si quid peccavit, in eo meâ quidem sententia peccavit, quod sanctorum Patrum causam, quos in prima operis sui parte oppugnavit, in secunda non melius pleniusque defenderit. Horum tu utrumque si vincere volebas, iudicio, doctrina, oratione vincere oportebat, non ambitione, non calliditate, non denique popinarum, sutrinarum, & reliquarum officinarum applausu, quorum amorem illis tuis Enchiridiis Deo & rationi adversus, tibi jam dudum conciliasti:

Virtute ambire oportet, non favoribus

Sed habet favorum semper, qui recte facit.

Nonne

Nonne te pudet incessit, cum subdolan illam Præ-
fationem Operis tui conscribebas, ubi te libido cæpit ejus-
modi verbis utendi, quæ alium non habent usum, quam
ut aliis male faciant, quæque mirificam artem tuam pro-
dunt aliis astute nocendi? At ita comparati sunt

*Plerique homines, quos cum nihil refert, pudet ubi pudendum est.
Ibi eos deserit pudor, cum usus est, ut pudeat. Is adeo tu es.*

Hæc habebam, Staidelj, quæ tibi de prima Operis
tui parte dicerem, cum plus otii nactus ero ad secundam
partem adgrediar, in qua barbariem illam, quæ in cere-
bro tuo residet, & cor acre, quod in pectore geris,
multo majoribus argumentis ostendisti. Interea vero tem-
poris Deum O. M. rogabo, ut mentem tuam a tenebris,
judicium ab ineptiis, orationem ab impuritate liberet,
purget, absolvat.

Constitueram, Staidelj, hæc meas in opus tuum ani-
madversiones in vulgus non emittere, sed eas tecum tan-
tummodo amice communicare, quo te vel ab ineptiis tuis
deducerem, vel certe a scribendo in posterum deterrerem.
Sed intemperantia tua effectum est, ut non licuerit mihi
in proposito meo, susceptoque consilio diutius permane-
re. Relatum est enim mihi, te omnes conlustrinas, suttin-
nas, ceterasque officinas continuo frequentare, & qua-
cunque occasione sermonem iniicere de hoc tuo recenti
opusculo, & de petulantia, atque improbitate, ut dicis,
eorum quos contra scripseris.

Quo pacto tibi laudem, gloriamque comparare, alios
vero, quorum vitam, doctrinamque rodis, in invidiam
rapere, & imperitæ multitudinis forum in eos excalefacere
conaris.

Hos autem non modo de doctrinæ improbitate, ve-
rum etiam de defectione a fide, & a Religione; non
tam ex animi tui sensu, quam quod hanc rem ad concitan-

tan-

tandum vulgus plurimum valere scis, accusas. Hos tu in sermonibus tuis sæpe nominas, & eisdem ipsos animo tuo obversatos esse, quum illam turbulentam, seditiosam, ac Sycophantiarum plenissimam ad opus tuum præfationem conscripsisti, facile unusquisque intelligit. Jam horum, quos Tu immerentes de perversitate postulas, famam tueri, horum scripta religionemque defendere, horum injuriam, quam ipsi leni & tranquillo animo ferunt, ulcisci me plane, qui eorum amicus sum, decet. Exeat itaque in lucem hocce meum de Opere tuo judicium, ut imperita plebs, quam tu artibus tuis tibi devinxisti, tandem aliquando cognoscat, quam peritus Scriptor, quam probus censor, & quanta fide dignus homo sis. Sed quoniam tu religionis prætextu tumultus in populo excitas, quod recentes sermones tui, & illa horribilis ac detestabilis præfatio, quam Operi tuo præposuisti, satis aperte declarant, operæ pretium est, ut antea te non dimittam, quam religionem tuam tuæque doctrinæ probitatem cum religione amicorum meorum comparaverim, & utra melior, sanior, rectior sit examinaverim. Meorum autem amicorum hæc religio est: Deum Optimum Maximum amare, & timere: proximum suum æque ac se ipsum diligere: Ecclesiæ præcepta venerari, atque servare: Sanctorum Patrum placita maximi, reliquorum hominum solam sine ratione auctoritatem nihili facere; ceteris in rebus solam rationem ducem sequi: in primis autem contemnere quoscunque libros, in quibus certi quidam Theologi tumultuosi, turbulenti, pugnaces, contentiosi, declamatores, sectarum, atque auctoritatis merè sectatores, rationis, prudentiæ, & æquitatis hostes: politicæ, Christianæque reipublicæ pestes, ac tempestates adversus probos doctosque viros stulte, & impudenter disputant, atque bacchantur.

Ita mihi Deus adsit, uti hæc est tam mea, quam amicorum meorum vera, minimeque fucata religio. Tu autem

autem, & tui similes nos conviciis vestris urgere perpetuo soletis, quia irridemus fabulas illas aniles, quas populo non modio, neque trimodio, verum ipso horreo demensas datis: quia superstitiosas vestras ariolationes despiciamus: quia nemini religionis causa more vestro maledicimus: quia capite recto, atque cello, minimeque in alterum latus inclinato procedimus: quia nemini, qui aliter, ac nos sentiat, infensi adeo sumus, ut ejus famam depeculemur: quia cor felle, & acerbo aceto oblitum non gerimus: quia bonos libros legimus, auctores malos, qui tibi, tuique similibus in deliciis sunt, contemnimus: quia nulli Scholæ nos mancipamus, nullius imperio paremus, optima quæque undique ratione, & judicio colligimus: contra quæ mala sunt, aut prava, aut inepta, & a ratione aberrantia, si vel ab optimo dicta scriptave sunt, rejicimus.

Jam vero age: videamus, quæ contra tua sit religio, atque hanc cum illa nostra comparemus, ut utra melior sit, intelligamus. Tua autem religio non aliunde melius profecto, quam ex Enchiridiis tuis Theologicis constare potest. At hæc tua Opera ita sunt comparata, ut pluribus in locis justitiam, pietatem, verecundiam lædant. Cujus autem scripta, doctrinæ, sententiæ eas res sanctissimas violant, is qua fronte religiosum se appellare, & profiteri, atque alios de sublesta fide postulare audeat, sane non intelligo. Quamobrem si justitiam, si pietatem, si modestiam, si temperantiam, tuis sententiis violas, non debes videri religiosus, vel certe religio tua multum mali, multumque vitii admixtum habebit. Ejusmodi autem a te traditas esse sententias, possem innumeris docere exemplis ex Enchiridio tuo petitis: quod etiam profecto facerem, nisi res esset plena laboris, plenaque molestiæ tum propter rerum, quæ proferendæ essent, multitudinem, cum ob ipsius tractationis, & materiæ fastidium, quando sanæ mentis homini nihil tantopere sto-

ma-

machum facere potest, quam magna in ostendendis, & exagitandis aliorum ineptiis occupatio. Quare pauca quædam ex Enchiridio illo tuo delibabo, quibus quam proba religione utaris, ostendam: ea vero summam, quæ magis obvia erunt, ut investigandi, & seligendi molestiam effugiam. Occurrit autem mihi pag. 120., in qua hæc verba tua lego. " Titius exigit a fure decem florenos, „ minitando, se alioquin eum manifestaturum, non te- „ netur restituere, nisi sit ea summa furto ablata: Ergo Tu in ea sententia es, ut quæ pecunia minis quæsitæ est, ea possit a metum inferente retineri? Deus immortalis! Num itaque minæ deinceps inter titulos ad acquirendum dominium habiles ponendæ erunt? Num quæ acquisitio a Jurisconsultis veteribus, recentioribus, Romanis, Græcis, gentilibus, Catholicis, Hæreticis, uno omnium consensu improbata est, ea ex Staidelii, Theologi Christiani sententia in posterum probanda erit? Num omnes Theologi, Jurisconsulti Legum Latores, qui pecuniam ejusmodi a metum inferente metum passo restitui oportere decreverunt, in errore quodam communi versati sunt; Staidelius autem veritatem solus deprehendit? Num reliqui omnes desipuerunt, Staidelius solus sapit? Optati Cives, populares, incolæ, accolæ, advenæ omnes plaudite huic Staidelio! concedite, atque abscedite omnes, de via decedite: nec quisquam tam audax nunc sit homo, qui obsistat illi. Hic solus sapiens est: immo quantus quantus est, totus est sapientia: ceteri omnes delirant. Sed cave, Staidelij, ne justitiam offendas, neve ex injusto facias justum, atque omnia æquitatis præcepta sus deque veritas. Nam quidquid alteri contra ejus voluntatem detrahimus, extorsio est: omnis autem extorsio injusta videri debet. Si enim justum erit alterius incomodo suum augere commodum, & propter suum emolumentum alteri metum inferre, & minari, dirumpi necesse est penitus humani generis Socie-

cietatem : Metus autem est instantis, vel futuri periculi causa mentis trepidatio . Sed qui furi minatur , se illum Judici indicaturum esse , cogit eum trepidare propter futurum periculum exilii , Triremium , aut etiam mortis . Quare fur , qui hujus periculi vitandi causa dat , non sua sponte dat , sed propter minas , quas alter adhibet : neque ille daturus fuisset , si alter a minis abstinuisset . Itaque invitus dat ; sed quod ab invito accipimus , extorsio est : at quod extortum est , retinere jus non est .

Cur igitur tibi , Staidelj , venit in mentem docere , non esse restituendum , quod metu illato furi detractum est ? Nam id jus non esse , vel ipsi Jurisconsulti Romani veteres agnovere , qui communi suffragio statuerunt , ut si quis in furto deprehensus sit , & ne prodatur ab eo , qui deprehenderit , aliquid huic dederit , succurri debeat metum passio per Edictum quod metus causa , quoniam non alia ratione motus dedit , quam quia si proditus fuisset , mortem , aut vincula pati debuisset ; quainobrem illum , qui accepit , proposita contra eum actione ad restitutionem cogendum esse voluerunt : *L. 7. D. de eo, quod metus causa gestum erit* . Hoc idem omnes Jurisconsulti recentiores docent , quod apud Glossam , Zasium , Duarenum , Equinarium Baronem , Donellum , Connanum , Huberum , Striichium , & alios innumeros videre potes . Idem & illi , qui de Jure naturæ scripsere , etiam si a fide & Theologia nostra alieni essent , disertis verbis pluribus in locis tradidere , quemadmodum apud Grotium , Pufendorium , Heineccium reperire poteris . Jam quæ impudentia , ne quid pejus dicam , tua est , Staidelj , quod Jurisconsulti omnes gentiles , Hæretici , Catholici , antiqui , & novi injustum esse uno ore prædicant , te id idem justum esse docere in Enchiridio quodam Theologiæ , in quo Christianæ religionis perfectio exigit , ut sanctiores morum regulas , & severiora justitiæ præcepta sequamur ? Quod si ex fontibus Jureconsultorum nihil haurire volebas ,

saltem Augustinum adiisses , cujus Epistola 54. potuisset te ab hac tua tam injusta sententia remove. Sed jam pergamus .

Tu pag. 154. ita scribis : “ Filius mercatoris valde „ industrius negotia patris gerit , & patre inscio magnos „ sumtus facit ludendo , & manducando . Est ne fur ? „ R. hunc filium , demtis expensis , quas in eo alendo „ facit pater , tantum posse accipere pro suo labore , in- „ dustriave , quantum extraneo præberet , si pater non „ erat factururus per se , sed per alium . “ O iniquam , & homine maturo indignam sententiam ! quam ego te non ex Theologo , aut Jurisconsulto aliquo , sed ex improborum , & petulantium adolescentum sermonibus , qui in Plauti , & Terentii fabulis leguntur , depromsisse suspicarer , nisi latinæ tuæ orationis impuritas palam ostenderet , te nunquam hos conspexisse libros . At quæ te ratio movere per Deum immortalem potuit , quamobrem Filium ejusmodi furtum non facere statueres ? Nonne furtum definitur esse contrectatio rei alienæ invito , aut ignaro Domino lucri faciendi caussa facta ? Nonne filius lucrum facit patre inscio ex paterna pecunia ? Nam quod filius postea eam pecuniam dissipat , tam parum ad eum excusandum facit , quam si alius quilibet fur rem furtivam profligaret ? Nonne filius patri obsequi , & operas ei præstare etiam sine ulla utilitate tenetur ? Nonne major in filio fides erga Patrem , quam alterius cujusque mercenarii erga Dominum & a naturali ratione , & ab æquitate , & ab ipsa pietate exigitur , suadetur , postulatur ? Quid ergo est , si furtum non est ? Edic utrum bonum factum est , an malum ? Primum non dices , opinor ; at si malum factum est , quid potest esse aliud , quam furtum ? At dicis , pater eam pecuniam , quam filius absumsit , alteri daturus fuisset . An ergo furtum non erit , si fur auferat eam pecuniam , quam Dominus fuisset alteri donaturus ? An ergo filius de paterna hac pecunia suo lubi-

lubitu disponet? An ergo eodem pacto docebis, posse filium hanc sibi pecuniam retinere, & lucrari? Jam quid hoc est aliud, quam aperire fores nequitiae, & injustitiam in forum, atque in omnium patrum familias domos introducere? Qua de causa omnes tibi patres iratos, atque infensos esse oporteret, quoniam eis fures in Aedibus collocas. Nam quum in filios familias luxuriosos tam sis benignus, eadem ratione & sobriis, ac temperantibus favere debes: quare si illi dilapident, hi lucrifaciant, & in proprios usus bene convertant pecuniam paternam, furtum ex neutra parte erit. Itaque Patres familias nec a probis, nec a malis filiis tuti erunt. Magnam profecto, & solidam gratiam initurus es ab omnibus filiis familias libidinosi, improbi, dementibus; sed non ab his modo, verum etiam ab avaris, & ab iis, qui paternas opes vivo patre expilant, & separatim sibi peculium constant.

Sed heus tu furum fautor, atque defensor, nimis jam mihi bilem moves, quum te tuorum Clientum causa videam facere facinora immortalia, & nimis magnas machinas parare, nimiosque dolos cudere, ut eos strenue tuearis. Nam pag. 208. doces, eum qui bonis cessurus est, tantum sibi clam retinere posse, quantum ei ad necessaria alimenta sufficiat, quamvis id eum creditorum præjudicio faceret; quam sententiam ut Clero tuo, ceterisque Lectoribus probes, Legum auctoritatem allegas. Edic autem ubi sunt istæ Leges, quo in loco reperiuntur, ubi delitescunt, ubi præscriptæ sunt, quo in populo latæ, aut cujus imperio ullo unquam tempore promulgatæ fuerunt? Quæ natio unquam tam barbara, & tam inhumana extitit, quæ decoctoribus, quæ prodigis, quæ perditis hominibus adversus Creditores eorum succurrendum esse statuerit? Quis legislator tam sævus, tam crudelis, tam improbus fuit, ut Lege aliqua Debitoribus concederet facultatem ea bona furandi, quæ Credi-

toribus jure debentur ? Nam illa lex septima Cod. Titulo *de his , qui bonis cedere possunt* , quam tu in eo loco citas , tota contra te est . Profer itaque , si potes , alias Leges , ostende , indica , aut patere , te fallum esse , & hominibus frustrandis , atque circumveniendis operam dare , palam prædicem . Extant profecto Leges , quæ nolunt a Creditoribus auferri Debitoribus jumenta ceteraque instrumenta ad agriculturam necessaria . At primum hæ Leges tum id servari volunt , quum alias res habet debitor , quibus Creditori satisfieri possit ; nam si nihil aliud haberet debitor præter hæc res ad culturam agrorum necessarias , tum in his quoque executionem fieri , eadem ipsæ Leges permittunt . Deinde quando res ad culturam necessariæ legibus excipiuntur , non etiam cetera , quibus ad vitam deinceps tolerandam Debitores indigent , excepta videri debent , quoniam hæc interpretatio , & ab ipsa ratione legis , & ab æquitate naturali vehementer abhorret . Quare si dolo malo , & singulari erga fures studio hanc improbam Doctrinam tuam protulisti , homo es valde injustus , si rationis inopia , & juris ignorantia hæc tradidisti , patere , ut plautinis versibus exclamem .

*Quicumque ubi sunt , qui fuere , quique futuri sunt post hac ,
Stulti , stolidi , fatui , fungi , bardi , blenni , buccones ,*

eos solus tu longe anteis stultitia , & moribus indoctis . O morum rectrix , atque gubernatrix Theologia , quam misere te Discipuli tui lacerant , quam improbe te tuæque sanctissima præcepta deserunt , quam perniciosas , atque perversas doctrinas libris suis spargunt , atque disseminant in orbis memoriam sempiternam ! Quanto justiores , & in genus humanum æquiores sunt Legum Romanarum interpretes , qui unica veste ad corpus tegendum excepta , ne unum quidem obulum ab eo , qui bonis cedit , retineri posse tradunt , quod jam dudum post . *Angel
Plat.*

Plat. & Fabr. Bartolus in Leg. fin. C. qui bonis ced. possunt. Jason §. fin. Inst. de act. n. 93. & Gair. de credit. cap. 4. n. 115. docuere.

Sed perpende Staidelj paullisper ipse tecum, quantas iniquitates hæc una sententia tua complectatur. Primum in eos, qui plerumque improbi homines sunt, & qui jure meritissimo in furcam agi deberent, comis est & liberalis: in Creditores autem, qui ab omni dolo, & culpa vacant, crudelis & sæva: tum eos, quos aut artium professione, aut manuum suarum opera, aut certe mendicando victum sibi, & familiæ suæ parare oporteret, tu in gravi veterno torpere, & Creditoribus furari permittis: post eos, quorum valde suspecta fides est, judices constituis in propria causa, quum ipsis facultatem tribuis, ut ex eo, quod Creditorum est, delibent, quantum ad victum suum, familiæque suæ suppeditare ipsi judicabunt. Denique quum æquum sit, ut quando Creditores sua sponte volunt communi Debitori alimenta relinquere, in ea pro rata sui crediti unusquisque Creditorum contribuat, & singuli aliquam crediti sui jacturam faciant, tu indulgendo Debitori, ut ipse sibi res ad victum necessarias clam retineat, facis, ut omne detrimentum chyrographarii tantummodo Creditores sentiant, ii autem, quibus bona immobilia oppignerata sunt, nullo in damno versentur, quum res immobiles a Debitore surripi nequaquam possint. Est autem iniquissima ut quum eadem esse deberet omnium Creditorum hac quidem in re conditio, tu tamen, Steidelj, hac sententia tua patieris, ut alii damno adficiantur, & rerum sibi debitarum jacturam faciant: contra alii id, quod ipsis debetur, integrum consequantur. Plane, ut videtur, id tibi propositum est, ut furibus placeas quamplurimum: nam pag. 175. doces: ut si quis: “fur otiosum equum, ex equili Caii abduxisset, ac post aliquot dies incolu-,, mem reddidisset, ad nihil aliud teneretur.” Ergo ne
ad

ad pretium usus quidem? At quæ ratio esse potest huius tam novæ, atque hætenus inauditæ doctrinæ? Ego ex tuis verbis eam esse colligo: quod nihil damni datum sit Domino equi, quoniam equo suo per eos dies usus non erat. Jam vero si usus causâ nihil in tua quidem sententia præstandum est, ac si solius damni ratio haberi debet, quum re aliena utimur, sequi necesse est, ut in locatione, conductione locator pro rei suæ usu, quem alteri concedit, nihil exigere possit, si damnum ei nullum, quum res sua ipsi abest, oriat. Nam si usus rei alienæ conductorem non obligat ad præstandam locatori mercedem, sed merces tantum ratione damni solvenda est, efficitur, ut quum damnum abest, solius usus causâ nihil solvi oporteat. Si vero solus usus titulum Locatori præbet ad postulandam jure mercedem, quamvis ipse Locator re sua usus non fuisset, neque damnum aliud, ea de causa patiatur, non video, cur in locatione, conductione pretium pro solo rei alienæ usu præstandum sit, in furto non sit, neque intelligo, quæ causâ sit, cur furi faveamus, non item conductori; denique non perspicio, cur bonæ fidei possessorem ad dandum pro usu rei alienæ pretium condemnemus, prædonem autem, & furem absolvamus? Lepidum profecto Theologum nacti sumus, qui nulla certa principia suæ doctrinæ habet, qui nullas ducit ex suis principiis consequentias, qui non ut ratio postulat, sed ut casus fert, quamlibet quæstionem definit, qui rationem derelinquit, ut benignus sit in omnes improbos, in perditos, in damni cupidos.

Sed quando dicis eum, qui equum incolumem reddiderit, ad nihil præterea teneri, sequetur, ut ne ad illud quidem damnum refarciendum teneatur, quod Dominus equi ea de causâ passus est, quod equi stercore per diuturnum fortasse tempus carere debuit. Quare si

Do-

Dominus dicat , se stercore ad agrum suum stercoreandum indiguiffe , tu tamen hunc a te abiges , neque ei quicquam a fure exigere permittes , quia fur ei equum otiosum surripuit , & incolumem reddidit . O bonum virum , o præclarum Theologum , & excellentem examinatore[m] profynodalem ? An tu eam Theologiam habes , quam Ballio ille Plautinus sequebatur , qui omnes bonos odio habebat , omnes contra improbos complectebatur , hanc sui moris rationem addens , nam .

*Boni Viri me pauperant , improbi alunt ,
Augent rem meam mali , populi strenui
Damno mihi , improbi usui sunt .*

Quamvis ego non hanc tuæ tam benignæ doctrinæ causam esse arbitror , verum illam potius , quod nulla habes in Theologia principia , sed omnia casu ita effutis , atque in chartam conjicis , ut tibi in mentem veniunt . Moveor , ut ita sentiam , quia videre te tamen alio in loco severiorem esse in fures , quam jura sive divina , sive humana permittant .

Nam pag. 132. doces , quod “ Leges tam divinæ ,
„ quam humanæ permittant , furem nocturnum , qui igno-
„ ratur , an rebus , vel etiam vitæ insidietur , aut furem
„ diurnum , qui se telo defendat , interficere . ” Sed jam
quæro ex te , quid si fur diurnus rem modicam auferat
tibi , & quæ sine magno tuo incommodo carere possis ?
Num si fur se telo adversus te eum persequentem defendat ,
tu eum jure occides , an potius pati debes ut rem
furatam impune secum auferat ? Item si rem magni valoris ,
qua carere non possis , fur tibi surripiat , sed prævideas fore ,
ut clamore facto populi concursus fiat , & fur retineatur ,
atque ad Magistratum ducatur , utrum eum nihilominus
persequi , ac si se telo defendat , occidere tibi licebit ? Denique si fur tantum in bonis habeat ,
ut

ut nihil dubites, quin æstimationem rei furatæ ab eo consequi possis, hunc a te jure interfici, si se defendat, posse putabis? Si in hisce facti circumstantiis, quas recensui, jure posse furi mortem inferri arbitraris, homo es valde injustus, & horribilem, atque execrandam Doctrinam, quam ne hæreticorum quidem quisquam ullo unquam tempore tradidit, profiteris, & possunt te Grotius, Pufendorfius, Barbeiracius, Heineccjus, quos tu viros ludibrio habere soles, multo meliora docere. Quod si vero has limitationes ad propositionem tuam admittas, sine, ut doleam te examinatore prosynodalem tam male consulere clero tuo, ut quæ paucis verbis exprimi potuissent, silentio prætermiseris, & errandi occasionem in re adeo magni momenti plerisque reliqueris. Sed vehemens mihi dubium oritur, ne occisoris causam magis, quam par est, tueri propositum tibi fuerit.

Video enim te p. 19. hæc verba scripsisse. "Titius, me armis invadit, quem etsi fugere possim interficio, ne imbellis videar. Estne casus reservatus? Minime." Ergo tua quidem sententia timor ignominiae aliquam præbet homicidæ excusationem? At contra videtur vel iis ipsis, qui a nostra religione dissentiunt, ut videre licet apud *Grotium de jure Belli, & Pacis cap. 1. §. 10. lib. 2. Buddeum in Philos., Part. 2. cap. 4. sec. 3. Heinecc. de Jur. nat., & Gent. Lib. 1. cap. 7. §. 187.* Quid igitur in eos inveheris, qui Hæreticorum libros legunt, quum ab eis sanctiora traduntur præcepta morum, quam illa sunt, quæ tu Theologus in Theologico opere Lectoribus catholicis tradere, & persuadere conaris. Ego mallet auctor esse cuicunque, ut de iis rebus, quæ ad hominum officia pertinent, quemlibet potius Auctorem paganum, aut hæreticum, quam opera tua, Staidelj, consuleret; minus etenim profecto deciperetur ab iis, quam a te, qui nulla officii præcepta firma, stabilia, & conjuncta naturæ tradis, qui consequentia non cernis, similitudines non com-
paras,

paras ; paria cum paribus non connectis , tibi ipse non consentis , & Doctrinam habes minime inter se consentaneam . Cujusmodi est illa Doctrina de mutuo , & censu germanico , quum in mutuo negas quidquam ultra sortem exigi posse : contra id ipsum permittis in censu germanico ; at ego ex te quæro , qua de causa in censu auctarium feras , in mutuo non feras ? An quia nominis sono census germanicus a mutuo differt ? Stultus es , si nominis rationem habes , nec potius ipsius contractus naturam spectes . An quia natura utriusque contractus diversa sit ? Falsum est , quia uti in mutuo , ita in censu dominium pecuniæ ita transfertur in accipientem , ut ea aliquando danti restituenda sit . An quia in censu titulus exigendi auctarii adest , in mutuo non adest ? Sed hoc quoque falsum est , nam in mutuo justus quandoque titulus petendi aliquid ultra sortem intervenire potest , quod omnes Theologi , & Jurisconsulti fatentur : contra contingere aliquando potest , ut in censu nullus adsit titulus , quomobrem auctarium petere tibi fas sit , præter unicam contrahentium conventionem , quod tute ipse in Enchiridio tuo doces . Quare ex hoc efficitur , ut quum tam mutuum , quam census germanicus iidem sint plane contractus , & nominis tantum sono discrepent , alterutrum docere debeas , sive ut tam in mutuo , quam in censu germanico aliquid ultra sortem peti possit , quamvis omnis titulus absit , sive ut non solum in mutuo , verum etiam in censu germanico omne auctarium injustum esse pronuncies , nisi titulus ejus exigendi accedat . Tu eos principium petere dicis , qui negant censum germanicum a mutuo differre , quare hoc ab ipsis demonstrandum esse excipis . Satis profecto inepte , quum nemo tam stultus esse possit , ut hæc non perspiciat . Nonne in censu unus dat , alter accipit pecuniam ? At hoc idem fit in mutuo . Nonne in censu dominium pecuniæ a dante transfertur in accipientem ? At hoc ipsum usuvenit in mutuo . Nonne

in censu restituenda est aliquando a debitore pecunia? At hoc etiam requiritur in mutuo. Nonne igitur per omnia similes sunt ambo isti contractus? Aut si quæ dissimilitudo est inter ipsos, cur tu eam non auferas, non probas, non allegas. Nam tibi jam incumbit onus exceptionis tuæ probandæ, quum nos ea præstiterimus, quæ debebamus. Quod si vero non ostendes, quod certe nunquam poteris, aliquam subesse inter hosce contractus in ipsa natura differentiam, tum ea salva manebunt, quæ supra diximus. Neque te juvat illa comparatio, quam pag. 175. facis; ubi ita scribis: “ Dic mihi si noster fur, equum ex
 „ equili Caii abduxisset, ac post aliquot dies incolumem
 „ reddidisset, ad nihil aliud teneretur: Si vero noster
 „ Sempronius a Cajo illum equum petiisset, Cajusque be-
 „ nigne commodasset, tum Sempronius, perinde ac fur
 „ equo restituto ad nihil aliud teneretur. Si autem Cajus
 „ locasset equum Sempronio, non ne in foro non solum
 „ fori, sed etiam poli præter equi restitutionem pactum
 „ præmium exigere posset, nec foret merus verborum lu-
 „ sus. “ At quantopere hæc tua ratiocinatio falsa, & inepta sit, videamus. Quod initio dicis furem, qui otio-
 sum equum abstulit, si eum incolumem restituat, ad nihil teneri præterea, quam injustum, & iniquum sit, supra ostendimus. Lepidum itaque Philosophum nacti sumus, qui pro comparationis suæ principio rem falsam, & iniquam assumit. Deinde quod dicis eum, qui commodato accepit equum, nihil præter hunc reddere teneri, hoc ex natura commodati venit, quod in eo differt a locatione conductione, quod commodatum non aliter quam gratis, contra locationem, & conductionem, non aliter quam certa mercede contrahimus. Quare quum hi contractus sua sint natura diversi, sequitur, ut alter gratuitus, alter onerosus sit. Non potest itaque hæc comparatio ad eos quoque contractus pertinere, quorum eandem constat esse naturam, ut in mutuo, & censu ger-
 mani-

manico. Sed hæc tua comparatio alia quadam de causâ perquam stulta, & absurda videri debet. Nam quando agitur de usu ejus rei, quæ mea manet, alteri cuiquam per contractum concedendo, in arbitrio contrahentium est, utrum hoc gratis, an mercede facere velint, quia certum est, pro usu ejus rei, quæ concedentis manet, pretium exigi pro lubitu posse. At quum rei dominium a dante transfertur in accipientem, tum dubium oritur, utrum is, qui rem acceptam restituere aliquando teneatur, simul etiam ad auctarium obligari possit? Ratio dubitandi est, quia non videtur jure peti posse pretium ejus rei, quæ mea amplius non est: Hæc ratio facit, ut tu teneas non licere in mutuo petere usuras. Sed quum hæc ratio etiam in censu procedat, quæ causâ est, ut eam deferas, & ut fraudem patiaris tam legi, quam rationi fieri per solam nominis mutationem? In commo- dato, & in locatione conductione nulla fraus legi fit, qualiscunque contractus ex illis ineatur; at in mutuo & in censu germanico fraus fit ei legi, quæ me ex re, quæ amplius mea non est, quidquam ultra sortem poscere vetat, si quod auctarium in mutui datione non possum, id per census germanici contractum percipiam. Tu te igitur, Staidelj, jam facile judicare poteris, quam sis in comparando & ratiocinando ineptus. Injuriam autem gravem doctissimo viro Antonio Genuensi facis, quem tecum sentire pag. 173. dicis. Nam hic nullum de censu germanico vel minimum verbum facit, sed id tantum docet, licere jure naturæ in ipso mutuo exigere auctarium, si pecunia, quæ datur, in manibus ejus, qui accipit frugifera futura sit. Ergo gravis iste auctor in ipso mutuo usuras admittit. Tu autem eas in mutuo illicitas, contra in censu germanico licitas esse ais: qui contractus quum iidem natura suæ sint, tu fraudem legi, quam existere fateris, mero verborum sono facis. Multi quidem viri docti & olim fuerunt, & nunc sunt, qui

E 2

usu-

ufuras in mutuo minime prohibitas esse statuerunt . At
 quod in mutuo vetitæ , contra in censu germanico per-
 missæ sint , nemo nisi insipiens aliquis , & mente captus
 dixit . Sed essem plane prolixior , quam aut oportet , aut
 propositi mei ratio postulat , si omnes Enchiridii tui locos
 persequi vellem , in quibus a te iustitiam violatam , &
 officium omne perversum esse animadverti . Quare jam
 tempus est , ut quomodo & verecundiam atque continen-
 tiam læseris , cognoscamus . Sed hac in re ideo ero bre-
 vior , quia animus meus a rerum turpium & obscenarum
 tractatione vehementer abhorret . Tu pag. 77. doces .
 „ Si Marcus ab uxore absens de ea sæpe cogitat , ac de
 „ præteritis , & futuris conjugalibus amplexibus valde de-
 „ lectatur . Non erit gravis culpa , si absit periculum pol-
 „ lutionis . “ At si nulli mortalium datum est , ut pos-
 sit ante prævidere , quid post rerum obscenarum recor-
 dationem , atque delectationem sequuturum sit , hæc tua
 doctrina plane inutilis erit , atque otiosa ; vel certe ho-
 mines impuros , & voluptatibus deditos , ut se se pericu-
 lo committere , & exitum voluptuosæ recordationis ex-
 pectare audeant , invitabit ; quibus si aliquando casu con-
 tingerit ut suo periculo , sine pollutione defuncti sint tum
 tibi habebunt maximas gratias , & benevolam doctrinam
 tuam summis laudibus prosequentur , quoniam illis per
 eam licuit suos amores , consuetudines , cocos , ludos ,
 sermones , suaves saviationes , amantum corporum com-
 pressionem , teneris labellis molles moriunculas , ac reli-
 qua omnia , quæ Pseudolus apud Plautum memorat , sine
 gravi peccato recordari . At quum hæc scribebas , nihilne
 te ratio ab Antoine *Tract. de obligat. cap. 3. §. 9.* ad-
 ducta movebat , qui ejusmodi maritum gravi in culpa
 versari ea de causâ docet , quoniam . “ Delectatio ve-
 „ nerea quævis valde commovet spiritus genitales eorum-
 „ que moleni excitat , quæ commotio spirituum genita-
 „ lium ex natura sua tendit , & ordinatur ad seminis ef-
 „ fusio-

„ fusionem , ideoque absente cum parte ad pollutionem .
 „ Ar sicut pollutio est lethalis , ita & omnis actus volun-
 „ tarius natura sua ad illam ordinatus . Ita *Navarrus* ,
 „ *Sylvest.* , *Azor* , *Vasquius* , *Layman* , & alii . “ Quam
 itaque dicis , culpam non esse gravem , quando pericu-
 lum pollutionis abest , maritis facultatem ariolandi tri-
 buis , nam nisi qui mariti sunt , iidem & divinatores
 sint , profecto non poterunt , utrum sequutura sit pollu-
 tio , nec ne , tuto prævidere : si autem exitus incerti in
 periculum sese conjiciant , magnum scelus admittunt ;
 quod & ratio docet , & omnium Theologorum consen-
 sus , auctoritasque declarat . Sed quum divinandi faculta-
 te nullus maritorum præditus esse possit , sequitur , ut
 nemo jam queat esse certus , se ex delectatione venerea
 sine ulla pollutione emerfurum esse . Quare temere agit ,
 qui animum suum ab ejusmodi delectatione continuo non
 revocat : omnis autem in re gravi temeritas insigne pec-
 catum est .

Sed quid ego a te continentiam , & verecundiam læ-
 sam esse doleo , quum ipsam in Deum optimum maxi-
 mum pietatem tollere , & funditus evertere non dubita-
 ris ? Nam quid spectat aliud ea propositio tua , qua pag.
 doces graviter non peccare eum , qui quum occupa-
 tionibus distractus sit per viginti , & plures etiam dies
 ab omni prorsus oratione abstinet , & exemplum de mi-
 lite in obsidione occupato adducis ? Ergo in tua , *Stai-
 delj* , sententia qui maximo divino auxilio indiget , qui
 proximus morti est : qui in extremo periculo est consti-
 tutus , nullum grave peccatum admittet , quando tam pa-
 rum suæ præsentis , futuræque salutis memor est , ut ad
 eum nullas fundat preces , qui ipsum unice regere , adju-
 vare , & succurrere potest ? Ergo tum maxime Dei obli-
 visci licebit , quum ejus ope , auxilio , gratia quam mi-
 nimum carere poterimus ? Apage , Theologe , cum ista
 nugaci impietate tua !

Non

Non minus autem impiæ sunt propositiones illæ tuæ ,
 quas de cultu festorum dierum pag. 141. , & seq. tradi-
 disti , quum doceas , eum satisfacere præcepto , qui in
 diebus festis audito missæ sacrificio per reliquum diei
 tempus aut venationi , aut librorum prophanorum lectio-
 ni operam dat . Tu si paullum modo in historia Eccle-
 siastica versatus esses , si veterum Christianorum mores
 exploratos haberes , si Conciliorum Decreta teneres , si vel
 Hereticorum hac de re libros , veluti Tinghami Orig-
 nes Ecclesiasticas perlegisses , denique , si ea scires , quæ
 unumquemque theologum scire oportet , has in Deum
 injuriolas doctrinas profecto non effutires : vide enim ,
 quam parum cum Ecclesiæ placitis hæ tuæ sententiæ con-
 veniant , ut & concilia pleraque , & Catechismus Ro-
 manus tuam doctrinam aperte improbent , atque refellant.
 Quamobrem ipsa quorundum Conciliorum , & Catechis-
 mi verba adferam , ut eo facilius errorem tuum aliquan-
 do agnoscas . “ Canon Jejunia dist. 3. de consecrat : Die
 „ Dominica nihil aliud agendum est , nisi Deo vacan-
 „ dum . Nulla operatio in illa sancta die agatur , nisi
 „ tantum hymnis , & psalmis & canticis spiritualibus dies
 „ illa transigatur . Nicolaus I. in resp. ad Bulg. consulta
 „ cap. 10. , & 11. Dominico die a labore terreno cessan-
 „ dum , ac omni modo orationibus insistendum , ut quod
 „ negligenter per sex dies agitur , per diem Resurrectio-
 „ nis Dominicæ precibus expietur : ut liberius ad Eccle-
 „ siam ire , psalmis , & hymnis , & canticis spiritualibus
 „ insistere , orationi vacare , oblationes offerre , memo-
 „ riis sanctorum communicare , ad imitationem eorum as-
 „ surgere , eloquiis divinis intendere , elemosinas indi-
 „ gentibus ministrare valeat Cristianus : quæ omnia si quis
 „ negligens , orationi tantum vacare noluerit , & ad ce-
 „ teras mundi vanitates licitos labores converterit , me-
 „ lius ei fuerat ipsa die laborare manibus suis , ut habe-
 „ ret , unde tribueret necessitatem patientibus . “ Conc.
 Turo-

Turonense Caroli M. ætate celebratum an. videl. 813. cap. 40. " Oportet, omnes Christianos in his diebus a
 „ fervili opere cessare, & in laude Dei, & gratiarum
 „ actione ad vespèram usque perseverare. " Conc. Remense an. 1583. de festis diebus hæc præscribit: diebus
 „ Dominicis, & festis in suas paræcias populus conveniat, & missæ, concioni, ac vespèris, intersit. " Conc. Burdig. eodem anno tit. de Festis hæc suis Parochis mandat: " Omnibus Provinciæ nostræ Parochis indicimus, ut populum suum frequenter, & serio commonefaciant, ut diebus festis non solum a quibuslibet
 „ prohibitis operibus se se contineant; verum etiam sacris omnibus ministeriis, & divini verbi prædicationi, quantum fieri possit, ex animo, & religione intersint: nec pietatis opera itidem prætermittant, in pauperibus reficiendis, afflictis consolandis, aliisque piis rebus gerendis, in quibus Christiana professio & charitas maxime elucescit. " Conc. Aquen. an. 1585. tit. de Fest. cul. " doceantur crebro ab his, ad quos pertinet, ut festos dies, qui Dei cultui dicati sunt, in divinis officiis, concionibus audiendis, nec non in orationibus, ac continuis erga nos beneficiis recolendis, sancte ac pie transigant; præsertim ut præter missam, quæ sine gravissimi peccati culpa prætermitti non potest, præter vespèras item, quibus fidelem quemcumque, nisi im-peditum, interesse maxime convenit, in doctrinæ christianæ rudimentis, omnes tam mares, quam fœminæ; tam viri, quam pueri, vel perdiscendis, si illa ignorent, vel aliis perdocendis versentur. " Con. Avenion. an. 1594. cap. 43. " Doceant Parochi ceterique verbi dei præcones, diebus festis Dei cultui dedicatis, divinis officiis, concionibusque audiendis, ceterisque id genus piis operibus vacandum esse. " Conc. Aquilei. 1596. Can. 14. " Tempus diei Festi in audiendis concionibus, missæ sacro, & divinis officiis ponendum est. " Catechif-

chismus Conc. Trid. 3. p. de 3. præcepto num. mihi 25. “
 „ Neque vero Parochus illud prætermittere debet, ut
 „ diligenter doceat quibus in operibus, atque actionibus,
 „ Christiani homines diebus festis exercere se debeant, vero
 „ ejusmodi sunt, ut ad dei templum accedamus, eoque
 „ loco pia, sinceraque animi attentione sacrosanctæ
 „ missæ sacrificio interimus, divina Ecclesiæ sacramenta,
 „ quæ ad salutem nostram instituta sunt, ad animæ vul-
 „ nerum curationem crebro adhibeamus attente
 „ præterea, diligenterque sacra concio Fidelibus audien-
 „ da est Exercitatio item, & studium Fidelium
 „ in precibus, divinisque laudibus frequens esse debet,
 „ præcipuaque eorum cura, ut quæ ad christianæ vitæ
 „ institutionem pertinent, ea diligenter addiscant, sedu-
 „ loque se exercent in iis officiis, quæ pietatem conti-
 „ nent, pauperibus, & egenis elemosinas tribuendo,
 „ ægros homines visitando; morientes, quique dolore
 „ afflicti jacent, pie consolando Ex his, quæ di-
 „ cta sunt, facile erit colligere, quæ contra hujus præ-
 „ cepti regulam committuntur. “ Conc. Mediolan. tit.
 „ *de Fest. Dier. cul. ad Concilia Narbon., Biturric., Triburien.*
 „ *Matifcon. ad S. Antoninum 2. p. tit. 9. c. 7. §. 4. & ad*
 „ *Cajetanum in summula, verbo Festum. Synodus sexta can. 9.*
 „ Diei Dominicæ tanta debet esse observantia, ut præ-
 „ ter orationes, & missarum solemnias, & ea, quæ ad ve-
 „ scendum pertinent, nihil aliud fiat.

Plura omnino iniquitatis, & impietatis tuæ exempla,
 Staidelj, commemorare possem: quæ nunc quidem silen-
 tio pertransire decrevi: quia mihi id unice propositum est,
 ut te condocifaciam, non ut urgeam, ut te ad erroris
 tui agnitionem perducam, non ut accusem, ut te a scri-
 bendo in posterum dehorter, non ut irrideam, atque ob-
 ruam. Proin tu, si sapiens, ingentes errores tuos sincere,
 atque ingenue profiteberis, populumque, ut ab eis ca-
 veat, ultro monebis. Neque expectabis, ut summus Pon-

Pontifex librorum suorum lectionem publico quodam edicto prohibeat. Non pugnabis itaque mecum, non contendes, non luctaberis, neque mihi, aut ulli amicorum meorum more tuo obtrectabis, aut maledices. Habeo alia quamplurima, quæ a me, nisi resipueris, omnia proferentur: atque ita me Deus perpetuo adjuvet, ut ego centenas sententias tuas iniquas inhonestas, invecundas, impias jam nunc in promptu habeo, quas si mihi stomachum movebis, omnibus patefaciam, atque ostendam: quibus alias quoque plures ejusdem generis doctrinas tuas profecto adjiciam, quum nihil mihi facilius sit, quam quantucumque libuerit injustitiæ, & ineptiarum exempla ex libris tuis, quos vario in genere edidisti, depromere. Tu a sermonis peritia, tu a judicio, tu a methodo, tu ab ordine, tu ab eruditione, tu a Philosophia, tu a Theologia destitutus es; hoc tu ipse jam perspicere, & intelligere potes, si modo tecum ipse cogitas, quod omnes libri tui in tabernis sprete, atque contempti jacent, aut certe garo, larido, ceterisque salsamentis circumvolvendis attribuuntur. Quis igitur te furor, quæ libido ad scribendum impellit, præsertim in hac litterarum luce, in qua quidquid paullum modo a summo discedit, continuo ad imum vergit? An Horatianum illud ignoras, quod

*Ludere qui nescit, campestribus abstinet armis
Indoctus pilæ, discive, trochive, quiescit,
Ne spissæ risum tollant impune coronæ.*

Ac profecto omnes risum tollunt, quum tu quid in lucem edis, præter bonos, & simplices illos clericos, quorum alios timor tanti examinantis prosynodalis, qualis tu es, a tui despectione cohibet, alios in schola tua educatos, atque seductos bona quædam jam tum de te tuaque doctrina concepta opinio in existimatione tui continet

tinet . Quæ quidem Clericorum persuasio quoniam cum maximo Reipublicæ , Religionis , ac rei litterariæ detrimento conjuncta est , Deum Immortalem non aliquo , Staidelj , odio tui , sed plane veritatis , & justitiæ amore incensus rogo , atque oro , ut ne hoc malum tam ingens , tam exitiosum , tam detestabile diutius in hac nostra regione serpere , atque regnare patiatur .



AD-

ADDITIONES

AD

DISSERTATIONEM.



Pura Staidelianæ effruditionis, parum sibi constantis animi, ac in sua opinione obfirmati, exempla proferri possent; sed heic unum notavisse, satis. Differens de secundo Casu Reservato homicidii voluntarii in exemplum adduxit illud Amalecites, qui Sauleni occidi rogantem interfecit. Super hoc ab Anonymo Theologo jure meritoque cum notatus fuisset, adhuc tamen in subsequenribus editionibus præfracte retinuit idem exemplum, quasi a proposito nihil disjunctum, ut videre est in recentissima edit. anni superioris pag. 19, tametsi ingratius in adnotatione ad eandem paginam fateri coactus fuerit, incertum esse, *suane Saul, an aliena manu ceciderit*. Porro id adeo a suo proposito disjunctum est, ut adseruerit in Disputatione I. de casibus Reservatis, ad reservationem requiri peccatum mortale ita certum, ut in probabili dubio saltem facti non sit Casus Reservatus. Atqui secundum P. Staidelium in Casu Amalecites habetur probabile dubium *Facti*, scilicet, *suane Saul, an aliena manu ceciderit*; ergo extra rem, & propositum homicidii voluntarii reservati est illud

Ad §. ubi de confusa, atque inter se dissidenti P. Staidelij doctrina agitur.

F 2

exemplum Amalecites , pro quo sexcenta alia certiora , aptioraque suppetebant . Mitto inter sacros Interpretes probabilius esse , quod Saul propria manu sibi mortem consciverit .

Ad §. de Mutuo , & Censu germanico .

Fœneratoriam esse Staidelianam Census Germanici Doctrinam , satis etiam constat ex eo , quod tradit S. Bonaventura . Ait enim Seraphicus Doctor *de X. Præceptis serm. 6. super V. VI. & VII. Præcept.* “ Sed quæritur ,
 „ si accommodo tibi vellem , vel Equum ,
 „ vel Domum , & accipio denarios , non est
 „ usura , sicut de pecunia ? Dico , quod in
 „ Veste , vel Equo , vel Domo trahitur usus
 „ ex re , non ex pecunia ; & ideo non dicitur usura . Aliqui credunt quod Usura
 „ sit mala , quia prohibita ; sed certe est
 „ prohibita , quia mala . Item in mutuo meum
 „ fit tuum ; & si tu aliquid acquiris per industriam tuam ex illo mutuo , & ego ex
 „ illo aliquid repeto , vendo tempus , quod
 „ est commune , quod non est licitum vendere . Sed in Accommodato non tran-
 „ sit mea res in tuam in mutuo pecunia
 „ mea fit tua , & non minoratur pecunia ,
 „ nec pejoratur ; sed in Accommodato Domus
 „ mea , Vestis mea , non fit tua , & minoratur , & pejoratur Domus , vel Vestis ; & tu elicis ex ea utilitatem tuam ,
 „ non sicut ex tuo , sed sicut ex re mea ,
 „ & diminuitur , & pejoratur ; Pecuniam autem mutuatam totam , & integram ,
 „ oportet , quod mihi reddas ; & ideo non excusor , cum peto aliquid de mutuo , &
 „ est ibi perversio ordinis , & appropriatio
 „ communitatis . “ Simillima habet idem S. Doctor *in expositione in cap. 6. Evang. secundum*

dum *Lucam*, ubi quærit, cur *Usura* prohibeatur, & respondet: " Ratio autem hujus prohibitionis est multiplex; tum quia pecunia, propter accommodationem non deterioratur: tum quia de se non fructificat, sed tota ratio utilitatis est ex parte utentis: tum quia continue consumit, & devastat; & ideo commodum mutui convertitur in commodum damni: tum quia in mutuacione pecuniæ transit rei mutuatæ dominium, quia non tenetur eadem numero reddere: tum quia totum transfertur periculum in eum, qui fuerat mutuatus: tum etiam quia in tali modo mutuandi plus diligitur nummus, quam Proximus; dum nummos Proximo accomodat, non ex amore Proximi, sed ex amore nummi. " Denique *In 3. sent. Dist. 37. in præcep. Decalogi*. Non furtum facies. *Dub. 7.* ita scribit: " similiter non simile de aliis possessionibus, & de pecunia. Et hoc ex triplici causa. Prima ratio est, quia in mutuacione pecuniæ transfertur pecunia in Dominum alienum. Et hujus signum est, quia non tenetur illam eandem numero reddere, sed illi consimilem (*ut loquimur in æquivalenti*); in accommodatione Domus, vel Equi dominium non transfertur. Alia vero ratio est, quia pecunia tum in usum vertitur, non consumitur, nec deterioratur; non sic autem est de aliis rebus, quæ, secundum quod magis, & diutius eis utimur, magis tendunt ad defectum. Tertia vero ratio est, quia pecunia, quantum est de se, per se ipsam non fructificat, sed fructus venit
 „aliu-

„ aliunde ; non sic autem est circa res , quæ
 „ de se ipsis afferunt fructum , & utilitatem ;
 „ & ideo non est simile . “ Igitur ex men-
 te S. Bonaventuræ lucrum , quod exigit , mi
 P. Staidelj , ex accomodatione , sive locatione
 pecuniæ , usura est ; & solum lucrum , quod
 petitur pro re , quæ commodata , & locata
 manet adhuc in dominio commodantis , &
 locantis , quæque *diminuitur* , & *pejoratur* ,
 iustum est , & licitum .

Pudeat ergo P. Staidelium ex Schola S.
 Bonaventuræ Theologum aut hæc numquam
 legisse , aut turpiter a Scholæ suæ Patrono ,
 ac Principe deiecvisse . Sed adhuc magis pu-
 deat eundem P. Staidelium immanis abusus ,
 quo ipse Seraphici hujus Doctoris auctoritatem
 detorquet ad persuadendas in suo Enchiridio
 absurdas suas opiniones , & laxitates . Ex.
 Gr. dicit pag. 19. “ Titius me armis inva-

*Ad S. de eo ,
 qui alium inter-
 ficit , ne imbel-
 lis videatur .*

„ dit , quem etsi fugere possim , interficio ,
 „ ne imbellis videar ? Estne Casus reserva-
 „ tus ? Minime , quia ex Doctrina S. Bona-
 „ venturæ non est homicidium voluntarium ,
 „ sed ex necessitate , & quasi coactum “ ;
 cum tamen ex eodem S. Doctore illa neces-
 sitas sit *vitabilis* , nec proinde homicidium
 involuntarium reddere valeat . Hæc sunt
 ejus verba *cit. serm. 6. de X. Præcep. pag. 405.*
 „ necessitas vitabilis est , si possum effugere ,
 „ sed dimitto propter verecundiam , vel aliam
 „ Causam “ . Porro heic cognoscere licet ,
 qua præstet eruditione , quove servandarum
 Legum zelo ardeat , P. Staidelius ; longe e-
 nim aliorum Probabilistarum , qui honoris de-
 fendendi causa licitum esse homicidium , as-
 serue-

feruerunt, laxitatem superavit, & quidem post
 plura S. R. Sedis Decreta ad cohibendas in-
 iustas huiusmodi teterrimas cœdes. Et vero
 Dominicus Viva in sua Trut. ad Prop. XVII.,
 & XVIII. damnatas ab Alexandro VII. n. 5.
 ita scribit: “ ut proinde Vir Equestris ex
 „ communi doctrina apud Lessium c. 3. tr. 3.
 „ p. 3. cap. 3., non teneatur fugere aggres-
 „ sorem cum suo dedecore, sed possit ab eo
 „ se defendere defensione occisiva; quod ta-
 „ men non est licitum Ecclesiasticis, aut ho-
 „ muncionibus, quibus fuga non est ignomi-
 „ niola, ut docent communissime “. Intel-
 ligat sapientissimus Theologus Staidelius. Non
 est licitum Ecclesiasticis, qualis ipse, neque
 homuncionibus interficere aggressorem, quan-
 do fugere possunt, quia talibus fuga, pro-
 brosa non est, teste ipso Dominico Viva,
 qui inter benigniores Probabilistas, ne dicam
 Laxiores, merito habetur.

Etiam Patritius Sporer *Tract. 5. in V. Præcep.*
Decal. cap. II. sect. 3. §. 4. n. 159, docet,
 „ ad honorem necessarium tuendum Viro ho-
 „ norato licere occidere injustum, ac contu-
 „ meliosum aggressorem “. Non igitur om-
 nibus indiscriminatim, ut ferre videtur Do-
 ctрина Patris Staidelij, sed dumtaxat *Viro ho-*
norato; non ad tuendum qualemcumque ho-
 norem, sed solum ad defendendum honorem
necessarium licet occidere, non quemlibet in-
 valorem injustum, sed invasorem injustum,
 ac insuper *contumeliosum*. Jam vero quæramus
 a P. Staidelio, num sibi viro Religioso, ac
 Regulari *necessarium* existimet honorem suum
 animositate, armis, contentionibus, cœdibus
 que

que defendere ; tametsi aliunde possit sibi fuga consulere , atque ab interimendo suo injusto Invasore abstinere ? Adde , quod in Invasore Patris Staidelj nec contumeliæ umbram notare possimus . Hæccine est Charitas Christiana ? Hæccine Humanitas , & Lenitas Clericorum , & quidem Regularium .

Audiat insuper P. Claudium La-Croix 1. 3. p. 1. n. 803. “ non teneris fugere Invalorem , si per hoc incurras gravem ignominiam ” . Per hoc , quod imbellis videri deberet Pater Staidelius , non tam facile mihi persuaserim , gravem ipsi subeundam esse ignominiam ; quare ne quidem benignissimus P. La-Croix excusaret ullo modo Staidelianum homicidium .

At quorsum hæc ? Causa jam finita est . Benedictus XIV. 4. Idus Novembris 1752. damnavit quinque Propositiones de Duello , quas ex ordine recitavit idem ipse P. Staidelius sui Enchiridii pag. 224. . Ex prima autem Prop. constat , Virum militarem culpæ reatum incurrere , ac etiam pœnæ obnoxium esse , si offerat , aut acceptet Duellum , ne formidolosus , ne timidus , ne abjectus , neve ad officia militaria ineptus habeatur ; indeque officio , quo se , suosque sustentat , privandus sit ; aut promotionis alias sibi debitæ , ac promeritæ spe perpetuo carere debeat . Immo vero ne quidem excusari posset , si honoris tuendi , aut humanæ vilipensionis vitandæ gratia Duellum acceptaret , aut offerret , quando etiam certo sciret , pugnam non esse secuturam , utpote ab aliis impediendam , ut patet ex damnatione Thesis
se-

secundæ cit. Decreti . Quare neque Pater Staidelius aut culpa , aut pœna vacabit , si , ne *imbellis*, videatur suum injustum aggressorem occiderit ; quin immo gravius delinquit , & magis puniendus est , quam si Duel- lum aut obtulisset , aut acceptavisset sine periculo ullius cœdis non modo , verum etiam effusionis humani sanguinis . Quod si metus incurrendæ notæ timiditatis homicidium nullo modo excusat ; quomodo illud excusabit a reservatione ? Denique hujusmodi metus non potest Clericum ab irregularitate incurrenda eximere . Quippe lego inter supra laudati S. Bonaventuræ opera in *Confessionali cap. 5. part. 37.* “ si fecerit homicidium necessitate evi-
 „ tabili (prout in Casu de eo , qui fugere
 „ potest) similiter ad superiores ordines non
 „ potest ascendere ; sed in susceptis cum eo
 „ potest dispensari , licet non facile dispensa-
 „ tur etiam per Papam “ . En rursus S. Do-
 ctor Seraphicus P. Staidelio omnino con-
 trarius .

Pari honoris , ac reverentiæ studio suum Seraph. Doctorem prosequitur P. Staidelius pag. 258. ejusdem Enchir. , quemadmodum etiam in aliis locis , quæ brevitatis gratia præ-
 terminere volumus . Quærit enim loco cit. , peccetne mortaliter Clericus , qui “ dicit offi-
 „ cium inattente , indevote , extra horam ,
 „ corrupte , & diminute “ ; ac respondet
 verbis S. Bonaventuræ in speculo animæ :
 „ non facile est judicandum mortale , nisi
 „ hoc proveniat ex contemptu “ . Ex contex-
 tu autem certum est , atque evidens , quod
 Clericus qui *scienter* , ac *voluntarie* violat Le-

gem de recitandis Horis Canonicis: *devote*,
attente, *sine interruptione*, & *sine diminutio-*
ne, peccet mortaliter. En integrum S. Bona-
venturæ testimonium, quod legitur cap. 3.
lib. laudati: “ qui jus positivum scienter o-
,, mittit, si id jus sit præceptorium, inobe-
,, diens est, & peccat MORTALITER. Un-
,, de illa, quæ ad jus positivum pertinent,
,, & habent rationem præcepti dimittere pec-
,, catum MORTALE judicatur. De his ve-
,, ro, quæ ad officium divinum specialiter
,, pertinent, est notandum, quod in hoc
,, multipliciter peccatur, scilicet dicendo Of-
,, ficiū inattente, indevote, extra horam,
,, corrupte, & diminute; unde tamen non
,, facile est judicandum mortale, nisi hoc
,, proveniat ex contemptu “. Videat insuper
P. Staidelius, si Seraph. Doctorem de con-
temptu formali locutum contendat, ne eun-
dem velut secūm pugnātem, sibi contra-
rium comminiscatur. Enim vero de *sex Alis*
Seraphin. cap. 8. in recitante Divinum Officiū
talem, ac tantam devotionem requirit, ut
dicat: “ Ignis est devotionis fervor, qui
,, semper in Altari cordis ardere debet, quem
,, Sacerdos devotus semper subiiciendo ligna
,, divinæ laudis debet nutrire, ne aliquan-
,, do extinguatur “. Jam fiscitor a religiosis-
simo P. Staidelio, an nutriet, ut *debet*,
ignem devotionis, & fervoris in Horis Ca-
nonicis recitandis, qui *inattente*, *indevote*, *ex-*
tra horam, *corrupte*, & *diminute*, non qui-
dem ex formali *contemptu*, sed tamen *scienter*
illas persolvit? Nullum igitur est dubium,
quin, locus a Staidelio citatus intelligi debeat
de

de mentis distractione , & indevotione , deque corruptione , ac diminutione aut non plane voluntariis , utpote haud *ſcienter* factis ; aut certe levioris momenti , quæ dubio procul non tam facile , ſecluſo contemptu tam formali , quam virtuali , ita negligenter orandi diu inolita conſuetudine , ſufficiunt ad peccatum mortale .

Pie ergo ſciteq. P. Franciſcus Henno *Diſput. 3. de III. Præcep. Decal. q. 1. concluſ. 8.*
 „ Licet ex vi præcepti Eccleſiaſtici , ait , non
 „ peccaret graviter , qui die Dominica , au-
 „ dita Miſſa privata , otioſe tempus tereret ,
 „ non tamen ſatisfaceret præcepto naturali
 „ conditionato de ſanctificatione illius diei .
 „ Hæc ſententia , licet non ita multos Ca-
 „ ſuiſtas (*quos inter numerandus eſt P. Stai-*
 „ *delius*) habeat Patronos , eſt tamen ve-
 „ riſſima , & in Conciliis , Patribus , & ra-
 „ tione evidentè fundata “ . Hæc omnino
 ſufficiunt ad demonſtrandam laxitatem , & falſitatem opinionis Staidelianæ circa dierum Feſtorum ſanctificationem . Verum ad retundendam iterum ejuſdem Patris Staidelj temeritatem , qua paſſim in ſuo Enchir. gloriatur , ſe ex fontibus S. Bonaventuræ ſuas opiniones hauſiſſe , hac etiam ſuper re locum ejuſdem Seraphici Doctoris in medium afferre lubet , ex quo evidentiffime patet , eum qui , audito ſacro , totum diem feſtum aut in venerationibus , aut in prophanis lectionibus inſumit , violare præceptum de ſanctificando die Sabbati . Itaque S. Bonaventura in 3. ſent. diſt. 37. in prædictum præceptum *dub. 3.* inter alia hæc præclare ſcripta reliquit :
 „ prop-

*Ad §. ubi de
 Sanctificatione
 Feſtorum agitur.*

„ propter quod in diebus illis (*idest festis*)
„ debent Ecclesias frequentare , Missas audi-
„ re , beneficia Dei recolere , verba prædi-
„ cationis audire , & spiritualibus (*non pro-*
„ *phanis*) documentis se ipsos imbuere .